

Informacija o novoj klasifikaciji djelatnosti u BiH

Tokom vremena dogodile su se značajne promjene u strukturi i organizaciji ekonomije, te u razvoju novih tehnologija, što je rezultovalo stvaranjem novih djelatnosti i novih proizvoda. Stoga je bilo nužno izvršiti cjelokupnu reviziju NACE Rev. 1.1 klasifikacije, odnosno ISIC Rev. 3 klasifikacije ekonomskih djelatnosti, kao i svih drugih klasifikacija koje se na njima zasnivaju.

Rezultat velike revizije, koja se u EU odvijala između 2000. i 2007. i koja je poznata pod nazivom „Operacija 2007“, je izrada nove verzije Statističke klasifikacije ekonomskih djelatnosti u EU - NACE Rev. 2.

S obzirom da je, u skladu sa Zakonom o klasifikaciji djelatnosti, Klasifikacija djelatnosti Bosne i Hercegovine (KD BiH) u svojoj osnovi preuzeti evropski standard, svaka revizija klasifikacije ekonomskih djelatnosti u EU povlači za sobom i promjene Klasifikacije djelatnosti BiH. Na ovaj način obezbjeđuje se kontinuitet uporedivosti BiH podataka na evropskom i svjetskom nivou.

U vezi s navedenim, statističke institucije u BiH izvršile su usklađivanje Klasifikacije djelatnosti Bosne i Hercegovine - KD BiH sa EU NACE Rev. 2 klasifikacijom. Radna grupa sastavljena od predstavnika sve tri statističke institucije u BiH, izradila je novu verziju statističke klasifikacije djelatnosti BiH pod nazivom Klasifikacija djelatnosti Bosne i Hercegovine 2010 - KD BiH 2010.

I pored toga što su se neka ranija pravila za primjenu klasifikacije djelatnosti promijenila, te revidirali kriteriji za sastavljanje klasifikacije i formulacije objašnjenja, osnovne karakteristike klasifikacije ostale su nepromijenjene. Važno je naglasiti da se značajno povećao nivo detaljnosti klasifikacije (sa 514 na 615 razreda), te se u KD BiH 2010 kao najnižem nivou upotrebljava nivo razreda, odnosno četverocifrena šifra djelatnosti, kao i u klasifikaciji NACE Rev. 2. U prethodnoj verziji KD BiH primjenjivala se peterocifrena šifra djelatnosti, što je bila dodatna razrada u odnosu na NACE Rev. 1.1.

Na osnovu čl. 6. i 9. Zakona o klasifikaciji djelatnosti u Bosni i Hercegovini (“Službeni glasnik BiH”, broj 76/06, 100/08 i 32/10) **Agencija za statistiku Bosne i Hercegovine, je donijela Odluku o klasifikaciji djelatnosti BiH 2010, koja je objavljena u “Službenom glasniku BiH” broj 47/10 od 08. juna 2010. godine. Sastavni dio ove Odluke čine:**

- a) Klasifikacija djelatnosti BiH 2010,**
- b) Klasifikacija djelatnosti BiH 2010 sa objašnjenjima,**
- c) Metodologija za statističku primjenu Klasifikacije djelatnosti BiH 2010.**

Odluka je stupila na snagu danom objavljivanja u “Službenom glasniku BiH”, a primjenjivati će se od 1. januara 2011. godine.

U periodu do 1. januara 2011. statističke institucije su pripremile i izvršile planirani set povezanih zadataka i aktivnosti u vezi sa koordiniranom tranzicijom iz KD BiH klasifikacije u KD BiH 2010, kao i u vezi sa implementacijom KD BiH 2010 u statistički poslovni registar i različite statističke domene.

Preduzeća (bez preduzetnika) u Statističkom poslovnom registru (SPR) prešifrirana su upotrebom izrađene tabele veza, korištenjem informacija iz postojećih statističkih istraživanja i provođenjem posebnog SPR istraživanja. Preostali dio preduzeća (bez preduzetnika) prešifriran je metodom vjerovatnoće na osnovu rezultata posebnog SPR istraživanja, te podataka iz statističkih istraživanja.

U statističkom poslovnom registru, obje verzije klasifikacije biti će operativne dok sva statistička istraživanja ne pređu na KD BiH 2010. Drugim riječima, za sve jedinice u statističkom poslovnom registru voditi će se dvije šifre djelatnosti, po KD BiH i po KD BiH 2010.